

PREDNACRT

ZAKON O LOVSTVU

Brčko, novembar 2011. godine

Na osnovu člana 22. Statuta Brčko distrikta Bosne i Hercegovine – (prečišćeni tekst) (« Službeni glasnik Brčko distrikta BiH», broj: 02/10), Skupština Brčko distrikta Bosne i Hercegovine, na svojoj _____ redovnoj sjednici održanoj _____ godine, usvaja

ZAKON O LOVSTVU

GLAVA I - OPŠTE ODREDBE

Član 1. (Predmet)

Ovim zakonom propisuje se:

- a) upravljanje lovnim resursima;
- b) gazdovanje lovištem;
- c) organizacija lovstva i lovišta;
- d) vlasništvo nad divljači i sistematska kategorizacija divljači;
- e) uzgoj, zaštita, lov i korištenje divljači i njenih dijelova;
- f) uspostavljanje, uređenje i racionalno korištenje lovišta;
- g) planiranje u lovstvu;
- h) katastar lovišta;
- i) sprečavanje i naknada štete od divljači i na divljači;
- j) sredstva za unapređenje lovstva;
- k) kadrovi u lovstvu;
- l) nadzor nad sprovođenjem zakona;
- m) kaznene odredbe;
- n) druga pitanja od značaja za oblast lovstva na teritoriji Brčko distrikta Bosne i Hercegovine (u daljem tekstu: Distrikt).

Član 2. (Definicija)

Pojmovi i definicije koje se koriste u ovom zakonu imaju sljedeća značenja:

- a) „**divljač**“ su divlje životinje iz klase sisara (Classis: Mammalia) i klase ptica (Classis: Aves);
- b) „**dlakava divljač**“ je divljač iz klase sisara;
- c) „**pernata divljač**“ je divljač iz klase ptica;
- d) „**lovna površina**“ je površina u lovištu na kojoj je moguće u potpunosti i na najcjelishodniji način sprovesti mjere gajenja, zaštite, lova i korištenja divljači;
- e) „**korisnik lovišta**“ je pravno lice koje u skladu sa ovim zakonom dobije lovište na gazdovanje;
- f) „**gazdovanje lovištem**“ podrazumjeva planske mjere koje korisnik poduzima u

lovištu, a obuhvataju:

- 1) obnovu,
 - 2) integralnu zaštitu,
 - 3) uzgoj,
 - 4) održivo korištenje,
 - 5) stalno poboljšanje kvaliteta lovnog fonda, njihovog staništa, lovne infrastrukture i drugih lovnih resursa;
- g) „**lovačko udruženje**“ je dobrovoljno udruženje građana udruženih radi organizovanog bavljenja lovstvom;
- h) „**lovac**“ je fizičko lice koje ima položen lovački ispit, oružani list, dozvolu za lov i obavlja osnovne zadatke lova: uzgoj, zaštitu, lov i korištenje divljači i njenih dijelova uz poštovanje lovačkih običaja i etike;
- i) „**lovna osnova**“ je planski dokument na osnovu koga se vrši zaštita i gajenje divljači, uređivanje i održavanje lovišta, lov i korištenje ulovljene divljači i njenih dijelova u lovištu;
- j) „**katastar lovišta**“ je obavezan dio lovne osnove koji sadrži podatke o:
- 1) osnivaču i korisniku lovišta,
 - 2) lovnim i nelovnim površinama,
 - 3) površinama pod kulturama,
 - 4) nadmorskoj visini i granicama lovišta,
 - 5) divljači,
 - 6) objektima.
- k) „**lovostaj**“ je određeni vremenski period u toku jedne godine u kojem je zabranjeno loviti, progoniti ili na drugi način uznemiravati ili ugrožavati lovostajem zaštićenu divljač;
- l) „**stalna zabrana lova**“ je zabrana lova određene vrste divljači čiji je opstanak u prirodi iz bilo kojih razloga ugrožen;
- m) „**privremena zabrana lova**“ je zabrana lova za divljač čija je brojnost u lovištu trenutno ugrožena ili smanjenja do te mjere da je divljač na granici opstanka;
- n) „**uzgajalište divljači u ograđenom prostoru**“ je investiciono-ekonomski objekat namjenjen za reprodukciju kvalitetene divljači;
- o) „**lovočuvar**“ je službeno lice koje vrši integralnu zaštitu i čuvanje lovnih resursa u lovištu;
- p) „**integralna zaštita divljači**“ obuhvata sprovođenje svih mjera koje obezbjeđuju uslove za život i reprodukciju divljači, kao i zaštitu od bolesti, štetočina, elementarnih nepogoda, protizakonitog korištenja i ugrožavanja;
- q) „**uzgoj divljači**“ je stručna operativna aktivnost kojom se obezbjeđuju povoljni uslovi ishrane, reprodckije, rasta i razvoja lovnog fonda, dostizanje njegove optimalne brojnosti, strukture i kvaliteta;
- r) „**uređenje lovišta**“ je sprovođenje projektovanih mjera koje su u funkciji efikasnije zaštite, uzgoja i korištenja divljači i lovišta;
- s) „**korištenje divljači i lovišta**“ je lovljenje divljači i korištenje njenih djelova, te korištenje prirodnih i drugih vrijednosti lovišta;
- t) „**sanitarni odstrjel**“ je odstrjel bolesne ili ranjene divljači, koji sprovode stručna lica, a dozvoljen je i u vrijeme lovostaja;
- u) „**uzgojni odstrjel**“ je odstrjel divljači neprikladne za dalji uzgoj i rasplod s ciljem poboljšanja strukture i kvaliteta lovnog fonda;

- v) „lovni resursi“ su divljač i sva druga materijalna dobra kojim raspolaže lovište;
- w) „teren za obuku i trening lovačkih pasa“ je dio lovišta, najviše do 5% ukupne površine, planiran lovnom osnovom za obuku i trening lovačkih pasa;
- x) „lovni dani“ su dani u kojima je dozvoljen planirani odstrjel divljači;
- y) „lovna godina“ je period od 1. aprila tekuće godine do 31. marta naredne godine;
- z) „dozvola za lov „ je isprava kojom se lovcu ili grupi lovaca odobrava lov na krupnu ili sitnu divljač;
- aa) „trofej divljači“ je divljač ili njeni dijelovi uređeni za čuvanje ili ocjenjivanje;
- bb) „vrhunski trofej divljači“ je trofej ocijenjen s većim brojem bodova od najjačeg evidentiranog trofeja pojedine vrste divljači ili njenih dijelova u Distriktu;
- cc) „lovački psi“ su psi određenih rasa koji se prema kriterijumima Međunarodne kinološke federacije (FCI) upotrebljavaju u lovstvu;
- dd) „C.I.C.“ je Međunarodni savjet za lov i zaštitu divljači;
- ee) „FACE“ je Federacija evropskih lovačkih organizacija;
- ff) „FCI“ je Međunarodna kinološka federacija.

Član 3. (Lovstvo)

(1) Lovstvo je ekološka, ekonomska, društveno-korisna i obrazovno-naučna djelatnost, koja je u funkciji integralne zaštite, uzgoja, održivog korištenja i stalnog poboljšanja kvaliteta lovnog fonda, staništa i drugih lovnih resursa.

(2) Na području Distrikta vrši se isključivo sportsko-rekreativni lov.

(3) Sportsko-rekreativno lovstvo podrazumijeva bavljenje lovstvom radi lične razonode i rekreacije članova lovačkog udruženja.

Član 4. (Korisnik lovišta)

(1) Korisnik lovišta može biti lovačko udruženje.

(2) Korisnik lovišta je dužan da:

- a) izvrši inventuru divljači i stanje lovišta;
- b) obezbjedi finansijska sredstva za sprovođenje lovne osnove, za štete na divljači i lovištu, kao i nadoknadu štete koju čini divljač;
- c) ima stručnu službu, odnosno stručno lice za sprovođenje lovne osnove;
- d) ima organizovanu lovočuvarsku službu;
- e) svoju djelatnost obavlja i unapređuje uz primjenu savremenih dostignuća lovačke struke i nauke, etičkog ponašanja i kadrovskog unapređenja u oblasti lovstva;
- f) informiše javnost o potrebi i značaju zakonske zaštite i unapređenja lovnih resursa, kao i njihovog održivog korištenja i trajnog poboljšanja.

Član 5. (Lovačko udruženje)

(1) Lovačko udruženje u smislu ovog zakona mora ispunjavati sljedeće uslove:

- a) da je registrovano za bavljenje lovstvom u skladu sa ovim zakonom;
- b) da ima najmanje 300 članova sa prebivalištem u Distriktu i položenim lovačkim ispitom.

GLAVA II - DIVLJAČ I NJENA ZAŠTITA

Član 6. (Divljač)

Divljač je u svojini Distrikta i kao dobro od opšteg interesa uživa posebnu zaštitu.

Član 7. (Vrste divljači)

Divljač, prema sistematskoj klasifikaciji, čine porodice i vrste iz klase sisara i porodice i vrste iz klase ptica, a svrstavaju se na sljedeći način:

a) porodice i vrste iz klase sisara:

- 1) porodica jelena (Cervidae), u koje spada: obični jelen (*Cervus elaphus* L.), jelen lopatar (*Dama dama* L.) i srna (*Capreolus capreolus* L.);
- 2) porodica šupljoroška (Bovidae), u koje spada: divokoza (*Rupicapra rupicapra* L.) i muflon (*Ovis musimon* Pall.);
- 3) porodica svinje (Suidae), u koje spada: divlja svinja (*Sus scrofa* L.);
- 4) porodica psa (Canidae), u koje spada: vuk (*Canis lupus* L.) šakal (*Canis aureus* L.) i lisica (*Vulpes vulpes* L.);
- 5) porodica mačke (Felidae), u koje spada: divlja mačka (*Felis silvestris* Sch.) i ris (*Lynx lynx* L.);
- 6) porodica (potporodica kune) kune (Mustelidae), u koje spada: kuna zlatica (*Martes martes* L.), kuna bjelica (*Martes foina* Erx.), tvor (*Mustela putorius* L.), velika lasica - hermelin (*Mustela erminea* L.), lasica (*Mustela nivalis* L.); potporodica vidra (Lutrinae), u koje spada: vidra (*Lutra lutra* L.) i potporodica jazavci (Melinae), u koje spada: jazavac (Melinae), u koje spada jazavac (*Meles meles* L.);
- 7) porodica medvjeda (Ursidae), u koje spada: mrki medvjed (*Ursus arctos* L.);
- 8) porodica zeca (Leporidae), u koje spada: obični zec (*Lepus euoreaus* Pall.);
- 9) porodica vjeverice (Sciuridae), u koje spada: vjeverica (*Sciurus vulgaris* L.);
- 10) porodica puha (Gliridae), u koje spada: veliki puh (*Glis glis* L.);

- 11) porodica voluharice (Microtidae), u koje spada: bizamski pacov (*Ondatra zibethicus* L.);
- 12) porodica dabrića (Myocastoridae), u koje spada: dabar (*Castor fiber* L.) i nutrija (*Myocastor coypus* Mol.);
- 13) porodica cibetka (Viveridae), u koje spada: mungo (*Mungos mungo*).

b) porodice i vrste iz klase ptica:

- 1) porodica tetrijeba (Tetraonidae), u koje spada: veliki tetrijeb ili gluhan (*Tetrao urogallus* L.), tetrijeb mali ili ruževac (*Lyrurus tetrix* L.) i lješarka (*Terastes bonasia* L.);
- 2) porodica fazana (Phasianidae), u koje spada: fazan (*Phasianus colchicus* L.), jarebica poljska ili trčka (*Perdix perdix* L.), jarebica kamenjarka (*Alectoris graeca* Meis.) i prepelica ili pučpura (*Conturnix conturnix* L.);
- 3) porodica patke (Anatidae), u koje spada: divlja patka ili patka gluhara (*Anas platyrhynchos* L.), patka kržulja ili krža (*Anas crecca* L.), patka pupčanica (*Anas querquedula* L.), patka kašikara (*Anas clypeata* L.), patka lastarka (*Anas acuta* L.), patka pjegava ili neretvanka (*Anas angustirostris* Men.), patka kreketaljka (*Anas strepera* L.), patka zviždarka (*Anas penelope* L.), patka krunata (*Anas fuligula* L.), patka žličarka (*Spatula clypeata* L.), patka glavata (*Nyroca ferina*), patka njorka (*Nyroca nyroca* Guld.), patka batoglavica (*Bucephala clangula* L.), divlja guska (*Anser anser* L.), guska glogovnjača (*Anser fabalis* Lath.), guska lisasta (*Anser albifrons* Scop.), utva zlatokrila (*Tadorna ferruginea* Pall.), utva morska (*Tadorna tadorna* L.), ronac veliki (*Mergus merganser* L.), ronac srednji ili brskavac (*Mergus serrator* L.), ronac bijeli (*Mergus albellus*), labud crvenokljuni (*Cygnus olor* Gm.), labud žutokljuni (*Cygnus cygnus*) i labud crnokljuni (*Cygnus bewicki* Yarr.);
- 4) porodica rode (Ciconiidae), u koje spada: roda bijela (*Coconia coconia*), roda crna (*Coconia nigra*), žličarka bijela (*Platalea leucordia* L.) i blistavi ražanj (*Plegadis falcinellus* L.);
- 5) porodice čaplje (Ardeidae), u koje spada: čaplja siva (*Ardea cinerea* L.), čaplja danguba (*Ardea purpurea* L.), čaplja žuta (*Ardeola ralloides* Scop.), čaplja bijela (*Egretta alba* L.), čapljica mala (*Ixobrychus minutus* L.), gak kvakavac (*Nycticorax nycticorax* L.) i bukavac nebogled (*Botaurus stellaris* L.);
- 6) porodica šljuke - vivci (Charadriidae), u koje spada: šljuka šumska ili šljuka bena (*Scolopax rusticola* L.), barska šljuka ili šljuka kokošica (*Capella gallinago* L.), šljuka livadarka (*Capella media* Lath.), šljuka kozica ili mala bokasina (*Lymnocyptes minimus* Brun.), žalar rdasti (*Calidris canutus* L.), žalar krivokljuni (*Calidris ferruginea* Brun.), žalar cerikavac ili sjeverni žalar (*Calidris alpina* L.), žalar cmčić (*Calidris temmincki* Lesl.), žalar mali (*Calidris minuta* Leisl.), prutka mrka (*Tringa erythropus* Pall.), prutka crvenonoga (*Tringa totanus* L.), prutka krivokljuna (*Tringa nebularia* Gunn.), prutka dugonoga (*Tringa stagnatilis* Bechst.), prutka pjegava (*Tringa ochropus* L.), prutka migavica (*Tringa glareola* L.), prutka mala (*Actitis hypoleucos* L.), muljača crvenorepa (*Limosa limosa* L.), muljača smeđa (*Limosa lapponica* L.) i vivak pozvizdač (*Vanellus vanellus* L.);
- 7) porodica galeba (Laridae), u koje spada: galeb obični (*Larus ridibundus* L.), galeb klaukavac (*Larus argentatus* Pont.), galeb čukavac ili galeb smeđi (*Larus fuscus* L.), galeb burni (*Larus canus* L.), galeb mali (*Larus minutus* Pall.), galeb

crnoglavi (*Larus melanocephalis* Temm.), galeb troprsti (*Rissa tridactyla* L.), pomornik veliki (*Stercorarius skua* Brun.), pomornik širokorepi (*Stercorarius pomarinus* Temm.), pomornik kratkorepi (*Stercorarius parasiticus* L.), pomornik dugorepi (*Stercorarius longicaudus* Vieil.), čigra obična (*Sterna hirundo*), čigra mala (*Sterna albifrons*), čigra dugokljuna (*Sterna sandvicensis* Lath.), čigra crna (*Chlidonias niger*), čigra bjelobrađa (*Chlidonias leucopareia* Temm.), čigra tustokljuna (*Gelochelidon nilotica* Gm.) i čigra ćubasta ili kotorska (*Hydroprogne tschegrave* Lep.);

- 8) porodica sokola (*Falconidae*), u koje spada: soko sivi (*Falco peregrinus* Tunst.), soko kragujac (*Falco subbuteo* L.) soko smeđi (*Falco cherrug* Gray.), soko mali ili soko kraguljić (*Falco columbarius regulus* Pall.), soko južni (*Falco biarmicus* Temm.), vjetruša kličtava (*Falco tinnunculus* L.), vjetruša kopčić (*Falco vespertinus* L.), vjetruša bjelonokta (*Falco naumanni* Fleisch.), eja poljska (*Circus cyaneus* L.), eja močvarica (*Circus Aeroginosus* L.) eja stepska (*Circus macrourus* L.), lunja rđasta (*Milvus milvus* L.) i lunja crna (*Milvus migrans*);
- 9) porodica jastreba (*Accipitridae*), u koje spada: orao suri (*Aquila chysaetos* L.), orao krstaš (*Aquila heliaca* Sav.), orao klokotaš (*Aquila clanga* Pall.), orao kličtaš (*Aquila pomorana* Brehm.), orao prugasti (*Hieraaetus fasciatus* Viell.), orao patuljasti (*Hieraaetus pennatus* Gm.), orao štekavac (*Haliaeetus albicilla* L.), orao zmijar (*Circaetus gallicus* Gm.), škanjac mišar (*Buteo buteo* L.), škanjac gaćaš (*Buteo lagopus* Brunn.), škanjac bjelorepi (*Buteo rufinus* Cretz), škanjac osaš (*Pernis apivorus* L), sup bjeloglavi (*Gyps fulvus* Havbl.), sup smeđoglavi (*Aegypius monachus* L.), kostoberina žutoglava ili brađaš (*Gypaetus barbatus*), strvinar bijeli (*Neophron perenopterus* L.), jastreb kokošar (*Accipiter gentilis* L.), kobac ptičar (*Accipiter nisus* L.) i kobac kratkonogi (*Accipiter badius brevipes* Severtzov);
- 10) porodica nesita ili pelikana (*Pelecanidae*), u koje spada: nesit ružičasti (*Pelecanus onocrotalus* L.) i nesit kudravi (*Pelecanus crispus* Bruch.);
- 11) porodica ždrala (*Gruidae*), u koje spada: sivi ždral (*Grus grus* L.);
- 12) porodica droplje (*Otididae*), u koje spada: droplja velika (*Otis tarda* L.) i droplja mala (*Otis tetrax* L.);
- 13) porodica liske (*Rallidae*), u koje spada: liska crna (*Falica atra* L.), kokošica mlakara (*Rallus aquaticus* L.), zelenonoga mlakuša (*Gallinula chloropus* L.), hariš ili prđavac (*Crex crex* L.), štijoka kusica (*Porzana pusilla* Pall.), štijaka riđa ili štijoka barska (*Porzana porzana* L.), štijoka vizlinica (*Porzana parva* Scop.) i sultanka modra (*Porphyrio porphyrio* L.);
- 14) porodica goluba (*Columbidae*), u koje spada: golub divlji ili pećinar (*Columba livia* Gm.), golub dupljaš (*Columba oenas* L.), golub grivnjaš (*Columba palumbus* L.), divlja grlica (*Streptopelia turtur* L.) i gugutka ili kumrija (*Streptopelia decaocto* Friv.);
- 15) porodica sove (*Strigidae*), potporodica prave sove (*Striginae*), u koje spadaju: sova buljina ili velika ušara (*Bubo bubo* L.), sova jastrebača (*Strix uralensis* Pall.), sova šumska (*Strix aluco* L.), sova šumska ili sova utina (*Asio otus* L.), sova močvarica (*Asio flammeus* Pont.), kukuvija drijemalica (*Tyto alba guttata* Brehm.), kukuvija smrtna ili ćuk obični (*Athene noctua* Scop.), sovica siva ili mrtvačka (*Aegolius funereus* L.), ćuk lulavac (*Otus scops* L.) i ćukuša kukavica (*Glaucidium passerinum* L.);

- 16) porodica gnjurca (Podicipedidae), u koje spadaju: gnjurac čupasti (Podiceps cristatus L.), gnjurac riđoglavi ili gnjurac rusogrli (Podiceps griseigena Bod.), gnjurac zlatouhi (Podiceps nigricollis Brehm.), gnjurac ušati (Podiceps auritus L.) i gnjurac mali (Podiceps ruficollis Pall.), porodica vranaci (Phalacrocoracidae): u koju spadaju: vranac veliki - kormoran (Phalacrocorax carbo), vranac kukmaš (Phalacrocorax aristotelis), vranac mali (Phalacrocorax pigmeus),
- 17) porodica pljenora (Columbidae), u koje spadaju: pljenor veliki (Colymbus immer Brunn.), pljenor žutokljuni (Colymbus adamsi Gray.), pljenor srednji (Colymbus arcticus L.) i pljenor mali (Colymbus stlatus Pont.);
- 18) porodica vrane (Corvidae), u koje spadaju: gavran (Corvus corax L.), vrana siva (Corvus corone cornix L.), vrana crna (Corvus corone L.), vrana gaćac (Corvus frugilegus L.), čavka (Coloeus monedula L.), šojka (Garrulus grandarius L.), svraka (Pica pica L.), kreja lješnikara (Nucifraga caryocatactes.), galica čolica (Pyrhocorax graculus L.) i galica crvenokljuna (Pyrhocorax pyrhocorax L.);
- 19) porodica ševe (Alaudidae) u koje spadaju: ševa velika (Melanocorypha calandra), ševa ćubasta (Galerida cristata), ševa kratkoprsta (Calandrella brachydactyla), ševa krunica (Lullula arborea), ševa planinska (Eremophila alpestris) i ševa poljska (Alauda arvensis).

Član 8. **(Zaštićena i nezaštićena divljač)**

(1) Divljač iz klase sisara i divljač iz klase ptica dijeli se na zaštićenu i nezaštićenu divljač.

(2) U zaštićenu divljač iz klase sisara spadaju sljedeće vrste: obični jelen, jelen lopatar, srna, divokoza, muflon, mrki medvjed, zec, vidra, vjeverica, puh, ris, nutrija, dabar i mungo.

(3) U zaštićenu divljač iz klase ptica spadaju sljedeće vrste: šumske koke, poljske koke, divlje patke, divlje guske, šljuke, čaplje (osim sive čaplje), rode, labudovi, supovi-lešinari, orlovi, škanjci, eje, lunje, sokolovi, nesiti, sivi ždralovi, droplje, liske, žalarke, prutke, muljače, vivak pozvizdač, pomornici, galebovi, čigre, ronci, grlice, golubovi, sove, gnjurci, pljenori, gavran, galica čolica i galica crvenokljuna.

(4) Vrste divljači koje nisu navedene u stavu (2) i (3) ovog člana smatraju se nezaštićenim vrstama divljih životinja iz klase sisara i klase ptica.

(5) Korisnik lovišta može proglasiti zaštićenom i divljač koja nije navedena u stavu (2) i (3) ovog člana, pod uslovom da je brojno stanje te divljači ugroženo.

Član 9. (Zaštita divljači)

(1) Zaštićena divljač iz člana 8. stav (2) i (3) ovog zakona dijeli se na:

- a) stalno zaštićenu;
- b) lovostajem zaštićenu;
- c) privremeno zaštićenu divljač.

(2) Stalna zaštita divljači određuje se za vrste divljači čija je brojnost znatno smanjena, opstanak ugrožen, zbog čega ih je potrebno sačuvati.

(3) Lovostajem su zaštićene one vrste divljači koje je slobodno loviti, ali samo u određeno vrijeme.

(4) Privremena zaštita divljači može se odrediti za vrste koje su lovostajem zaštićene ili su u kategoriji nezaštićene divljači, u slučaju značajnog smanjenja njihove brojnosti i održivosti.

(5) Stalno i privremeno zaštićenu divljač je zabranjeno loviti, proganjati i namjerno uznemiravati.

Član 10. (Stalna zaštita divljači)

Stalna zaštita određuje se za sljedeće vrste zaštićene divljači: vidra, ris, vjeverica, dabar, mungo, koka velikog tetrijeba, mali tetrijeb i njegova koka, koka lještarka, čaplje (osim sive čaplje), rode, labudovi, supovi - lešinari, orlovi, škanjci, eje, lunje, sokolovi, nesiti, sivi ždral, droplje, liske (osim crne liske), žalarke, prutke, muljače, vivak pozvizdač, pomornici, galebovi, čigre, sove, ronci, gnjurci, pljenori, galica čolica, galica crvenokljuna, djetlić, sve ptice pjevačice osim sive vrane, svrake, sojke i gačca.

Član 11. (Lovostajem zaštićena divljač)

(1) Lovostajem se zaštićuje sljedeća vrsta divljači: obični jelen, jelen lopatar, sma, divokoza, muflon, mrki medvjed, zec, puh, nutrija, mužijak velikog tetrijeba, prepelica, jarebica kamenjarka, jarebica poljska, mužijak lještarme, šljuka, divlji golub, grlica, fazan i ženka fazana, divlja patka gluvara, krdža i gugutka, divlja guska, crna liska, sojka, gačac i ševa.

(2) Šef Odjeljenja za poljoprivredu, šumarstvo i vodoprivredu (u daljem tekstu: Šef Odjeljenja) određuje vrijeme trajanja lova lovostajem zaštićene divljači.

Član 12.
(Privremena zabrana lova)

(1) Ako u lovištu nastane primjetno smanjenje brojnog stanja određene vrste lovostajem zaštićene i nezaštićene divljači zbog elementarnih nepogoda, bolesti i drugih nepovoljnih okolnosti, korisnik lovišta obavezan je da odmah privremeno zabrani lov te vrste divljači, kao i da preduzme sve mjere radi uspostavljanja njenog prethodnog brojnog stanja, strukture i kvaliteta.

(2) U roku od sedam dana od dana saznanja da korisnik lovišta nije privremeno zabranio lov, šef Odjeljenja donosi odluku o privremenoj zabrani lova i utvrđuje potrebne mjere iz stava (1) ovog člana.

Član 13.
(Odstrjel divljači)

(1) Izuzetno, u vrijeme lovostaja, divljač se može organizovano i kontrolisano odstreljivati, ukoliko predstavlja neposrednu opasnost po život i zdravlje ljudi ili imovinu.

(2) Rješenje za odstrjel divljači iz stava (1) ovog člana donosi šef Odjeljenja, na zahtjev korisnika lovišta i po pribavljenom mišljenju nadležne veterinarske službe.

Član 14.
(Naseljavanje novih vrsta divljači)

(1) Naseljavanje novih vrsta divljači vrši korisnik lovišta na osnovu odobrenja šefa Odjeljenja.

(2) Korisnik lovišta uz zahtjev za odobrenje iz stava (1) ovog člana dostavlja uvjerenje od nadležne veterinarske službe o zdravstvenom stanju divljači koja se naseljava.

(3) Šef Odjeljenja rješenjem određuje stepen zaštite nove vrste divljači koja se pojavi ili unese na teritoriju Distrikta.

Član 15.
(Proglašenje i zaštita ugroženih vrsta divljači)

(1) Zaštita ugroženih vrsta divljači vrši se u skladu sa odredbama ovog zakona.

(2) Na osnovu kategorizacije Međunarodne unije za zaštitu prirode (IUCN), šef Odjeljenja, uz prethodnu saglasnost šefa odjeljenja nadležnog za zaštitu životne sredine, rješenjem proglašava ugroženost pojedinih vrsta divljači.

Član 16.
(Zaštita divljači koja migrira)

(1) Vrste divljači koje migriraju iz susjednih zemalja, a koje nisu u lovnom fondu Distrikta, imaju istu zakonsku zaštitu kao i u zemlji iz koje dolaze.

(2) Lov ptica selica vrši se u skladu sa odredbama domaćeg i međunarodnog zakonodavstva.

Član 17.
(Zabrane)

(1) Zabranjeno je:

- a) trovanje divljači;
- b) žeti i kositi poljoprivrednim mašinama koje nemaju ugrađene uređaje za plašenje i istjerivanje divljači;
- c) paljenje korova, strnjika, trstika, trave i drugih rastinja u lovištima;
- d) oblaganje otvorenih kanala, akumulacija, jezera i obala vodotoka plastičnim i drugim materijalima na način koji bi ugrožavao divljač;
- e) upotrebljavati sredstva za zaštitu bilja i druga hemijska sredstva u količinama i dozama koje mogu prouzrokovati štetu na divljači;
- f) loviti ptice i sisare korisne za poljoprivredu i šumarstvo;
- g) uništavanje, hvatanje i prisvajanje mladunčadi, oštećivanje i uništavanje gnijezda, legla i jaja zaštićene i nezaštićene divljači.

(2) Šef Odjeljenja pravilnikom utvrđuje koje se ptice i sisari smatraju korisnim za poljoprivredu i šumarstvo.

Član 18.
(Divljač u ograđenom prostoru)

(1) Zabranjeno je hvatanje divljači i držanje divljači u zatvorenom ili ograđenom prostoru.

(2) Izuzetno, šef Odjeljenja može dati saglasnost za hvatanje i držanje divljači u ograđenom prostoru u slučaju:

- a) kada to zahtijevaju potrebe nauke, nastave, zooloških vrtova, muzeja i izvoza, uz saglasnost sa korisnikom lovišta;
- b) naseljavanja lovišta ili uzgajališta divljači u ograđenom prostoru;
- c) suzbijanja zaraznih bolesti;
- d) potrebe treninga i ispitivanja urođenih osobina lovačkih pasa.

(3) Šef Odjeljenja donosi podzakonski akt kojim utvrđuje uslove, način hvatanja i držanje divljači u ograđenom prostoru.

Član 19. **(Zabrana uznemiravanja i lova divljači)**

- (1) Zabranjeno je uznemiravati i loviti divljač:
- a) ako je ugrožena požarom, poplavom, snježnim nanosima, poledicom i drugim elementarnim nepogodama;
 - b) upotrebom reflektora, farova, baklji i drugih svjetlosnih izvora, ogledala, gramofona, magnetofona, vještačkih i živih mamaca, vabilica i omamljujućih sredstava;
 - c) nerasnim i neobučanim psima, hrtovima, poluhrtovima;
 - d) gađanjem iz motornih vozila i drugih sredstava na motorni pogon, kao i gaženjem motornim vozilima;
 - e) poluautomatskom lovačkom puškom sa više od dva metka, poluautomatskim lovačkim karabinom, vojničkim oružjem i vojničkom municijom;
 - f) otrovom, omčama, zamkama, klopnama, gvožđima, mrežama, električnim uređajima ili drugim sredstvima za masovno hvatanje, odnosno uništavanje;
 - g) papkastu i lovostajem zaštićenu divljač puškom sačmaricom, pomoću pasa, pogonom i prigonom i grupnim lovom, izuzev divljih svinja;
 - h) u vrijeme lovostaja, nelovnim danima, u toku bremenitosti i odgoja mladunčadi;
 - i) na udaljenosti manjoj od 300 metara od naselja ili objekata za stanovanje.

(2) Nerasnim psima iz stava (1) tačke c) ovog člana smatraju se psi koji nisu registrovani kod nadležne kinološke organizacije i koji nemaju rodovnik.

(3) Zabranjeno je sa psima proganjati divljač van terena određenog za trening u periodu od 15. januara do 31. jula.

(4) Izuzetno od odredbi stava (1) tačke b) i f) ovog zakona, Šef Odjeljenja može odobriti korisniku lovišta hvatanje divljači mrežama, klopnama i omamljujućim sredstvima, ali samo za: naučne svrhe, vještački uzgoj, preseljenje u druga lovišta, kao i za potrebe zooloških vrtova i izvoza.

GLAVA III - LOVIŠTE

Član 20. **(Lovište)**

(1) Lovište je osnovna prostorna jedinica za održivo upravljanje, gazdovanje i korištenje lovnih resursa.

(2) Lovištem se smatra površina zemljišta, šuma i voda koje predstavljaju prostomu, prirodnu i ekološki zaokruženu cjelinu u kojoj postoje povoljni uslovi za život,

reprodukciju, rast i razvoj divljači, infrastruktura i drugi potrebni lovni resursi, nezavisno od vlasništva.

(3) Lovište čine lovna i nelovna površina.

(4) Nelovne površine su:

- a) naseljena mjesta i parkovi u naseljima;
- b) plantažni voćnjaci i vinogradi, rasadnici i druge šumske i poljoprivredne površine koje su ograđene ogradom kroz koju dlakava divljač ne može da prolazi;
- c) objekti za liječenje, odmor i rekreaciju;
- d) aerodromi, groblja, javne saobraćajnice, aktivni površinski kopovi i druge komunalne površine;
- e) površine koje su na udaljenosti manjoj od 300 m od stambenih i pomoćnih objekata izvan naseljenog mjesta, dvorišta seoskog domaćinstva, dvorišta industrijskih i drugih objekata;
- f) površine koje se koriste za vojne i naučne svrhe;
- g) ograđeni prostori za uzgoj divljači;
- h) ostale površine i objekti na kojima je u skladu sa drugim propisima zabranjen lov.

(5) Zabranjen je lov divljači na površinama iz stava (4) ovog člana.

Član 21. (Vrste lovišta)

(1) Lovište na području Distrikta je otvorenog tipa.

(2) Lovište otvorenog tipa je lovište u kojem je omogućena nesmetana dnevna i sezonska migracija divljači.

Član 22. (Lovište s obzirom na nadmorsku visinu)

(1) S obzirom na nadmorsku visinu lovište na području Distrikta je ravničarskog tipa.

(2) Ravničarsko lovište je lovište kome je najmanje 70% površine ispod 400 metara nadmorske visine.

Član 23. (Površina lovišta)

Površina lovišta nalazi se unutar područja Distrikta i predstavlja areal na kojem su obezbijeđeni elementarni stanišni uslovi za život, reprodukciju, rast i razvoj divljači osnovnog lovnog fonda i migratornih vrsta divljači.

Član 24.
(Lovište prema namjeni)

- (1) Lovište na području Distrikta je sportsko-rekreativnog tipa.
- (2) Sportsko-rekreativno lovište je lovište čije je osnovna namjena sport i rekreacija dobrovoljnih i neprofitabilnih udruženja građana.

Član 25.
(Ustanovljavanje lovišta)

- (1) Odluku o ustanovljavanju lovišta i granicama lovišta donosi Skupština Brčko distrikta Bosne i Hercegovine (u daljem tekstu: Skupština) na prijedlog Vlade Brčko distrikta Bosne i Hercegovine (u daljem tekstu: Vlada).
- (2) Odlukom o ustanovljavanju lovišta određuje se: naziv, namjena lovišta, granice i površina lovišta, vrste divljači koje ga naseljavaju, divljač koja je pod posebnom zaštitom i drugi uslovi potrebni za održivo gazdovanje lovnim resursima.
- (3) Prijedlog odluke o ustanovljenju lovišta izrađuje Odjeljenje.

Član 26.
(Dodjela lovišta)

- (1) Lovište se neposredno dodjeljuje na gazdovanje jednom lovačkom udruženju u roku od 30 dana od dana donošenja akta o ustanovljavanju lovišta.
- (2) Lovište se dodjeljuje na gazdovanje na određeno vrijeme koje ne može biti kraće od deset godina niti duže od 20 godina.
- (3) Odluku o dodjeli lovišta na gazdovanje donosi Vlada na prijedlog šefa Odjeljenja.
- (4) Korisnik lovišta ne može lovište ili dio lovišta dati u zakup, niti ustupiti drugom korisniku.

Član 27.
(Uslovi dodjele lovišta)

- (1) Dodjela lovišta vrši se na osnovu pismenog zahtjeva lovačkog udruženja upućenog Odjeljenju.
- (2) Lovačko udruženje uz pismeni zahtjev dostavlja:

- a) dokaz o registraciji udruženja;
- b) dokaz da ima najmanje 300 članova sa prebivalištem u Distriktu i položenim lovačkim ispitom;
- c) dokaz da ima angažovano stručno lice iz člana 62. ovog zakona;
- d) dokaz da ima organizovanu lovočuvarsku službu iz člana 63. ovog zakona;
- e) Plan rada za period gazdovanja lovištem sa mjerama za unapređenje lovstva.

Član 28. (Ugovor o dodjeli lovišta)

(1) Na osnovu odluke o dodjeli lovišta, gradonačelnik sa lovačkim udruženjem zaključuje ugovor o dodjeli lovišta na gazdovanje.

(2) Ugovor iz stava (1) ovog člana sadrži:

- a) naziv, namjenu, granice i površinu lovišta;
- b) period na koji se lovište dodjeljuje na gazdovanje;
- c) godišnju visinu i način plaćanja naknade za korištenje lovnog fonda;
- d) prava i obaveze korisnika lovišta u pogledu zaštite i gajenja divljači ;
- e) mjere koje je korisnik dužan preduzeti u cilju unapređenja gazdovanja lovištem;
- f) uslove pod kojima se mijenja, dopunjuje ili raskida ugovor ;
- g) druge odredbe u skladu sa zakonom.

Član 29. (Naknada za korištenje lovnog fonda)

(1) Korisniku lovišta određuje se godišnja naknada za korištenje lovnog fonda iz člana 28. stav (2) tačka c) ovog zakona, uzimajući u obzir veličinu lovišta, vrijednost planirane divljači za odstrjel tokom lovne sezone i broj članova korisnika lovišta.

(2) Visinu i način plaćanja naknade za korištenje lovnog fonda utvrđuje Vlada, na prijedlog šefa Odjeljenja.

(3) Sredstva od naknade za korištenje lovnog fonda uplaćuju se na Jedinostveni račun Trezora (u daljem tekstu: JRT).

Član 30. (Raskid ugovora)

(1) Gradonačelnik sa korisnikom lovišta raskida ugovor iz člana 28. ovog zakona u slučajevima ako:

- a) korisnik lovišta prestane da ispunjava uslove na osnovu kojih je stekao pravo na gazdovanje lovištem;

- b) korisnik lovišta ne izvršava prava i obaveze utvrđene ugovorom;
- c) korisnik lovišta ne donese lovnu osnovu u propisanom roku ili ne gazduje lovištem po odredbama lovne osnove;
- d) sredstva ostvarena gazdovanjem lovištem ne koristi u svrhe određene ovim zakonom i ugovorom;
- e) korisnik lovišta prestane sa radom;
- f) u lovištu prestanu uslovi radi kojih je lovište ustanovljeno;
- g) se ustanovi povoljniji način korištenja lovnih resursa.

(2) Postupak raskida ugovora po osnovu stava (1) tačka a), b), c) i d) ovog člana može pokrenuti šumarski inspektor ili Odjeljenje.

(3) U slučaju raskida ugovora po osnovu iz stava (1) tačka a), b), c), d) i e) ovog člana, dotadašnji korisnik lovišta je dužan da nadoknadi nastalu štetu.

(4) U slučaju raskida ugovora po osnovu iz stava (1) tačka f) i g) ovog člana, dotadašnji korisnik lovišta ima pravo na naknadu uložениh, a neiskorištenih sredstava od budućeg korisnika.

(5) Visinu naknade iz stava (3) i (4) ovog člana zainteresovane strane utvrđuju sporazumom.

(6) U slučaju kada se sporazum ne može postići, o naknadi iz stava (3) i (4) ovog člana odlučuje Osnovni sud Brčko distrikta Bosne i Hercegovine (u daljem tekstu: Osnovni sud).

(7) Odluku o raskidu ugovora donosi Vlada.

Član 31. (Privremena predaja lovišta)

Ukoliko iz bilo kog razloga lovište ostane bez korisnika, na prijedlog Odjeljenja Vlada odlukom određuje način zaštite i čuvanja divljači na području lovišta.

Član 32. (Obilježavanje granica lovišta)

(1) Granice lovišta se vidno obilježavaju na mjestima koja su određena odlukom o ustanovljenju lovišta iz člana 25. ovog zakona.

(2) Korisnik lovišta dužan je u roku od tri mjeseca od dana dodjele lovišta vidno obilježiti granice lovišta i trajno ih održavati.

(3) Šef Odjeljenja donosi podzakonski akt kojim utvrđuje način obilježavanja granica.

GLAVA IV - PLANIRANJE U LOVSTVU I KATASTAR LOVIŠTA

Član 33. (Lovna osnova)

(1) Lovištem se gazduje na osnovu lovne osnove i godišnjih planova gazdovanja lovištem.

(2) Odredbe lovne osnove i godišnjih planova gazdovanja lovištem su obavezujuće za korisnika lovišta i bez njih lov nije dozvoljen.

(3) Lovna osnova obavezno sadrži:

- a) opšte podatke o lovištu;
- b) bonitet lovišta za osnovne vrste divlječi;
- c) katastar lovišta;
- d) brojno stanje lovostajem zaštićenih i trajno zaštićenih vrsta divljači u lovištu;
- e) ciljeve gazdovanja lovištem i mjere za ostvarivanje ciljeva;
- f) plan uzgoja i zaštite divljači;
- g) plan odstrjela divljači;
- h) plan unapređenja i održavanja lovišta;
- i) mjere za sprečavanje šteta na divljači i šteta od divljači;
- j) ekonomsko-finansijski plan gazdovanja lovištem;
- k) kartu lovišta u razmjeri do 1: 50 000.

Član 34. (Izrada lovne osnove)

(1) Lovnu osnovu predlaže i donosi korisnik lovišta za period od deset godina.

(2) Korisnik lovišta dužan je donijeti lovnu osnovu u roku od jedne godine od dana dodjeljivanja lovišta.

(3) Sredstva za izradu lovne osnove obezbjeđuje korisnik lovišta.

(4) Izradu lovne osnove vrši pravno lice koje je registrovano za tu djelatnost i posjeduje licencu za rad.

Član 35.
(Odobranje lovne osnove)

(1) Saglasnost na lovnu osnovu daje šef Odjeljenja, uz pribavljeno mišljenje stručne komisije.

(2) Šest mjeseci prije isteka roka za koji je donesena lovna osnova, korisnik lovišta predlaže novu lovnu osnovu i dostavlja Odjeljenju na saglasnost.

(3) U roku od 60 dana od dana prijema prijedloga lovne osnove, šef Odjeljenja donosi odluku o saglasnosti na lovnu osnovu ili stavlja primjedbe na dostavljeni prijedlog.

(4) Greške i nedostatke lovne osnove utvrđene od strane stručne komisije dužno je o svom trošku otkloniti pravno lice kojem je povjerena izrada lovne osnove.

(5) Revizija lovne osnove obavlja se kada su trajno ili bitno izmjenjeni uslovi i okolnosti na kojima se zasniva lovna osnova, a posebno usljed uginuća više od 1/3 divljači, požara, elementarnih nepogoda, trovanja i slično.

(6) Revizija lovne osnove vrši se na način i po postupku propisanom za njeno donošenje.

(7) Troškove revizije lovne osnove padaju na teret onog koji je uzrokovao izmjenu uslova na kojima se zasniva lovna osnova.

(8) Sastav, rad i troškove rada stručne komisije iz stava (1) ovog člana utvrđuje Vlada na prijedlog šefa Odjeljenja.

Član 36.
(Usklađenost lovne osnove)

(1) Lovna osnova mora biti usklađena sa:
a) prostornim planom;
b) dugoročnim planovima razvoja poljoprivrede, šumarstva, vodoprivrede, zaštite prirode i zaštite životne sredine.

(2) Vlasnici, odnosno korisnici zemljišta, voda, šuma, poljoprivrednih i drugih kultura na kojima se nalazi lovište dužni su dozvoliti radnje i mjere gazdovanja lovištem predviđene lovnom osnovom.

Član 37.
(Godišnji plan gazdovanja lovištem)

(1) Do donošenja lovne osnove, korisnik lovišta gazduje lovištem na osnovu privremenog godišnjeg plana gazdovanja lovištem, a najduže godinu dana.

(2) Po donošenju lovne osnove, korisnik lovišta dužan je u skladu sa lovnom osnovom i stanjem u lovištu donijeti godišnji plan gazdovanja lovištem.

- (3) Plan gazdovanja lovištem iz stava (1) i stava (2) ovog člana obavezno sadrži:
- a) opšte podatke o lovištu i korisniku lovišta;
 - b) rezultate gazdovanja lovištem u prethodnoj lovnoj godini;
 - c) brojno stanje lovostajem zaštićenih i trajno zaštićenih vrsta divljači u lovištu;
 - d) plan uzgoja i zaštite divljači;
 - e) plan odstrjela divljači;
 - f) plan uređivanja, opremanja i održavanja lovišta;
 - g) mjere sprečavanja šteta na divljači i od divljači;
 - h) ekonomsko-finansijski plan gazdovanja.

(4) Privremeni godišnji plan gazdovanja lovištem i godišnji plan gazdovanja lovištem izrađuje se za period od 1. aprila tekuće godine do 31. marta naredne godine i dostavlja Odjeljenju na davanje saglasnosti najkasnije do 30. aprila.

(5) Korisnik lovišta dužan je prije izrade plana gazdovanja iz stava (1) i stava (2) ovog člana utvrditi brojno stanje divljači u lovištu i utvrđeno brojno stanje prikazati u planu kao matični fond na početku lovne godine.

(6) Planovi gazdovanja lovištem iz stava (1) i stava (2) ovog člana odobravaju se na isti način kao i lovna osnova.

Član 38. (Evidencije i izvještaji)

(1) Korisnik lovišta dužan je voditi evidenciju o izvršenim radovima i sprovedenim mjerama predviđenim lovnom osnovom i godišnjim planom gazdovanja lovištem.

(2) Izvještaj o izvršenim radovima i poduzetim mjerama u prethodnoj lovnoj godini dostavlja se Odjeljenju najkasnije do 15. aprila tekuće godine.

Član 39. (Podzakonski akti)

Šef Odjeljenja donosi podzakonske akte kojim utvrđuje:

- a) sadržaj, način izrade i nosioce izrade lovne osnove, privremenog godišnjeg plana gazdovanja lovištem i godišnjeg plana gazdovanja lovištem;
- b) način proljetnog prebrojavanja divljači;
- c) evidencije o realizaciji mjera predviđenih lovnom osnovom i godišnjim planom gazdovanja lovištem.

Član 40.
(Katastar lovišta)

- (1) Za lovište se ustanovljava i vodi katastar lovišta.
- (2) Katastar lovišta ustanovljava i vodi korisnik lovišta i podatke dostavlja Odjeljenju do 30. aprila tekuće godine za proteklu lovnu godinu.
- (3) Šef Odjeljenja donosi pravilnik kojim utvrđuje sadržaj, način vođenja i dostavljanja podataka katastra lovišta.

GLAVA V - LOV I KORIŠTENJE DIVLJAČI

Član 41.
(Lov divljači)

- (1) Lov divljači obuhvata traženje, osmatranje, slijeđenje, snimanje, izbor jedinki za odstrjel, odstrjel ili hvatanje, sakupljanje odstrijeljene divljači i njenih dijelova, uređenje i evidenciju trofeja.
- (2) Divljač mogu organizovano loviti lica koja imaju položen lovački ispit, oružani list i dozvolu za lov, uz primjenu odredaba etičkog kodeksa lovca.
- (3) Divljač mogu loviti i u lovu učestvovati članovi lovačkog udruženja, domaći i inostrani lovci turisti koji nisu članovi lovačkog udruženja na osnovu dozvole za lov izdate od strane korisnika lovišta.
- (4) Domaći i inostrani lovci, koji nisu članovi lovačkog udruženja, u lovu mogu učestvovati samo u pratnji lovočuvara ili stručnog pratioca, koga ovlasti korisnik lovišta.
- (5) Lovci pripravnici učestvuju u lovu bez prava odstrjela divljači i pod nadzorom lovca mentora.
- (6) Šef Odjeljenja, na prijedlog korisnika lovišta, donosi podzakonski akt kojim utvrđuje oblik, sadržaj, način izdavanja i rok važenja dozvole za lov.

Član 42.
(Uslovi vršenja lova i promet ulova)

- (1) Korisnik lovišta donosi akt kojim određuje ko i pod kojim uslovima može vršiti lov divljači i učešće lovaca u korištenju ulova.

- (2) Akt iz stava (1) ovog člana sadrži:
- a) bliže uslove za lov i vrijeme trajanja lova;
 - b) pravo lovaca u korištenju ulovljene divljači i njenih dijelova;
 - c) kontrolu lova divljači;
 - d) iznos naknade za ulovljenu divljač i njene djelove;
 - e) pružene usluge u lovištu;
 - f) izdavanje propratnice i trofejnog lista;
 - g) visinu naknade za izdavanje dozvole za lov;
 - h) naknadu za učinjenu štetu i mjere bezbjednosti u korištenju lovišta;
 - i) mjere za zaštitu životne sredine;
 - j) odnose sa institucijama i drugim organizacijama iz oblasti zaštite prirode;
 - k) druge odredbe od značaja za lov i korištenje divljači.
- (3) Na akt iz stava (1) ovog člana saglasnost daje šef Odjeljenja.
- (4) Promet ulovljene divljači i njenih dijelova vrši se preko korisnika lovišta.

Član 43. (Lovački ispit)

- (1) Lovačkim ispitom provjerava se osposobljenost lica za lov.
- (2) Lice koje je tokom školovanja položilo predmet lovstvo oslobođeno je polaganja lovačkog ispita.
- (3) Zahtjev za polaganje lovačkog ispita zainteresovano lice podnosi korisniku lovišta.
- (4) Lovački ispit polaže se pred stručnom komisijom koju imenuje korisnik lovišta, uz saglasnost šefa Odjeljenja.
- (5) Komisiju iz stava (4) ovog člana čine najmanje tri člana od kojih je jedan predstavnik Odjeljenja.
- (6) Troškovi polaganja lovačkog ispita padaju na teret kandidata.
- (7) Korisnik lovišta izdaje uvjerenje o položenom lovačkom ispitu.
- (8) Visinu naknade za polaganje lovačkog ispita i izdavanje uvjerenja o položenom lovačkom ispitu utvrđuje korisnik lovišta uz prethodnu saglasnost šefa Odjeljenja.
- (9) Šef Odjeljenja podzakonskim aktom utvrđuje:
- a) program i način polaganja lovačkog ispita;
 - b) izgled i sadržaj obrasca uvjerenja o položenom lovačkom ispitu;
 - c) izgled i sadržaj obrasca zapisnika o polaganju lovačkog ispita;

d) izgled i sadržaj obrasca i način vođenja registra o izdatim uvjerenjima o položenom lovačkom ispitu.

Član 44. (Naknada za lov)

(1) Ulovljena ili uginula divljač i njeni dijelovi pripadaju korisniku lovišta.

(2) Za pružene usluge u lovištu i korištenje divljači i njenih dijelova, korisniku lovišta plaća se naknada.

(3) Lovac, član lovačkog udruženja koje gazduje lovištem, plaća za korištenje divljači i njenih dijelova:

- a) za visoku divljač 30% tržišne vrijednosti;
- b) za nisku divljač 25% tržišne vrijednosti.

(4) Domaći i inostrani lovci turisti, koji nisu članovi lovačkog udruženja, za korištenje divljači i njenih dijelova i drugih usluga plaćaju punu tržišnu cijenu.

(5) Cjenovnik odstrjela, korištenja divljači i usluga u lovištu na osnovu tržišne vrijednosti donosi Vlada, na prijedlog korisnika lovišta i mišljenja Odjeljenja.

Član 45. (Propratnica)

(1) Ulovljena divljač i njeni dijelovi mogu se iznositi iz lovišta samo uz propratnicu.

(2) Korisnik lovišta izdaje propratnicu na propisanom obrascu i vodi evidenciju o izdatim propratnicama.

(3) Šef Odjeljenja, na prijedlog korisnika lovišta, donosi podzakonski akt kojim utvrđuje oblik obrasca, sadržinu, način i postupak izdavanja propratnice.

Član 46. (Trofeji i trofejni list)

(1) Trofejima od divljači, u smislu ovog zakona, smatraju se:

- a) kosti lobanje sa parogovima smdaća i jelena;
- b) rogovi divojarca, divokoze i muflona;
- c) kljove divljeg vepra;
- d) lobanja i krzno medvjeda, vuka, šakala, divlje mačke, jazavca i lisice;
- e) cijeli primjerak velikog tetrijeba, fazana i druge pernate divljači.

(2) Trofeji od divljači mogu se iznositi iz lovišta samo uz trofejni list.

(3) Korisnik lovišta izdaje trofejni list na propisanom obrascu i vodi evidenciju o izdatim trofejnim listovima.

(4) Šef Odjeljenja, na prijedlog korisnika lovišta, donosi podzakonski akt kojim utvrđuje oblik obrasca, sadržaj, način i postupk izdavanja trofejnog lista.

(5) Šef Odjeljenja donosi podzakonski akt kojim utvrđuje uslove pod kojima se vrši prepariranje divljači i držanje trofeja javno izloženih u objektima, kao i upotreba mesa divljači u ugostiteljskim objektima.

Član 47. (Ocjena trofeja)

(1) Korisnik lovišta je dužan komisijski izvršiti ocjenjivanje lovačkih trofeja i izdavanje trofejnog lista.

(2) Komisiju za ocjenjivanje lovačkih trofeja i potpis trofejnog lista imenuje korisnik lovišta, uz saglasnost Odjeljenja.

(3) Čanovi komisije iz stava (2) ovog člana moraju imati položen ispit za ocjenjivanje trofeja.

(4) Komisija iz stava (2) ovog člana vrši ocjenu trofeja na osnovu standarda Međunarodnog savjeta za lov i zaštitu divljači (u daljem tekstu: CIC).

(5) Šef Odjeljenja donosi podzakonski akt kojim utvrđuje:

- a) program osposobljavanja za ocjenjivače trofeja;
- b) način polaganja ispita;
- c) način izdavanja uvjerenja i oblik uvjerenja;
- d) izgled i sadržaj obrasca zapisnika o polaganju ispita za ocjenjivače trofeja;
- e) oblik, sadržaj i način vođenja registra o izdatim uvjerenjima o osposobljenosti za ocjenjivača trofeja.

Član 48. (Vrhunski trofeji)

(1) Vrhunskim trofejima smatraju se tri po broju CIC poena najjača trofeja određene vrste divljači u Distriktu, utvrđena na osnovu evidencije baze podataka o vrijednosnim trofejima.

(2) Bazu podataka o vrijednim trofejima vodi korisnik lovišta.

(3) Korisnik lovišta dužan je Odjeljenju dostaviti podatke iz trofejnog lista za trofeje zlatne, srebrene i bronzane medalje.

(4) Vrhunski trofej je vlasništvo onog ko je divljač odstrijelio i ne može biti iznešen van teritorije Distrikta sve dok po vrijednosti CIC poena ne dođe na četvrto mjesto i više.

(5) Ocjenu po kojoj vrhunski trofej ne spada u kategoriju prva tri mjesta daje korisnik lovišta.

(6) Šef Odjeljenja donosi podzakonski akt kojim utvrđuje vođenje baze podataka trofeja.

Član 49. (Oružje u lovištu)

(1) U lovište je dozvoljeno unijeti samo lovačko oružje.

(2) Bez odobrenja korisnika lovišta, osim službenih lica u vršenju službenih radnji i dužnosti, zabranjeno je svim licima kretanje kroz lovište:

- a) sa vatrenim oružjem, pješke ili u prevoznim sredstvima;
- b) sa drugim sredstvima za lov;
- c) sa lovačkim psima;
- d) kretanje van puteva koji služe opštoj upotrebi.

(3) Zabranjeno je kretati se van javnih puteva i voziti po lovištu sa lovačkim oružjem koje nije u futrolji ili u prtljažniku automobila.

Član 50. (Odstrjel divljači)

(1) Odstrjel divljači dozvoljen je samo lovačkom puškom kuglarom sa izolčenom cijevi i puškom sačmaricom.

(2) Puškom kuglarom lovi se divljač visokog lova, a puškom sačmaricom divljač niskog lova.

(3) Izuzetno od stava (1) ovog člana odstrjel jelena, medvjeda, muflona, srne, velikog tetrijeba i divokoze dozvoljen je samo lovačkom puškom kuglarom sa izolčenom cijevi, a divlje svinje i puškom sačmaricom, metkom sa jednom kuglom.

Član 51. (Psi u lovištu)

(1) U lovu se mogu koristiti samo lovački psi, uz posjedovanje dokumenata koji potvrđuju rasnost i identitet psa.

(2) Za lov na pojedinu vrstu divljači u određenom području dozvoljeno je koristiti samo odgovarajuću vrstu pasa.

(3) Vlasnicima pasa nije dozvoljeno puštati pse da se bez kontrole kreću po lovištu.

(4) Ovčarski psi mogu biti u lovištu samo uz stado.

(5) Vlasnici pasa odgovorni su za štetu koju njihovi psi učine u lovištu.

(6) Šef Odjeljenja donosi podzakonski akt kojim utvrđuje vrstu, broj i način korišćenja lovačkih pasa.

Član 52. (Obuka lovačkih pasa)

(1) Tereni za obuku i trening lovačkih pasa određuju se lovnom osnovom, a najviše do 5% ukupne površine lovišta.

(2) Na terenu za obuku i trening lovačkih pasa zabranjen je lov i nošenje oružja.

(3) Zabranjen je trening i obuka pasa u martu, aprilu i maju, osim u ograđenim prostorima, gaterima i vještačkim rovovima.

GLAVA VI - SPREČAVANJE I NAKNADA ŠTETE

Član 53. (Preduzimanje potrebnih mjera za sprečavanje štete od divljači)

(1) Korisnik lovišta dužan je da preduzima potrebne mjere za sprečavanje štete koju divljač može nanijeti ljudima ili njihovoj imovini na zemljištu i vodi na kojima se prostire lovište na način da održava broj divljači prema kapacitetu lovišta, obezbjeđuje prehranu u lovištu, postavlja čuvara i drugo.

(2) Vlasnici stoke i zemljišta, odnosno korisnici zemljišta na kome se lovište prostire ili koja su u blizini lovišta dužni su na zemljištu, objektima gdje stoka prebiva i opremi koja se koristi u obradi zemlje preduzimati potrebne mjere za sprečavanje šteta od divljači i na divljači.

(3) Mjere za sprečavanje štete su:

- a) postavljanje efikasnih ograda, električnog pastira, plašila;
- b) zaštita mladih sadnica omotavnjem ili premazivanjem;
- c) ispaša stoke sa čobanom na površinama dozvoljenim za pašu;
- d) postavljanje plašilica na kosačice, kombajne i drugo.

(4) Korisnik lovišta i korisnici zemljišta i voda, na čijem području je ustanovljeno lovište, kao i korisnici okolnih zemljišta i voda, mogu pitanje naknade štete koju divljač učini regulisati međusobnim sporazumom.

Član 54. (Naknada štete)

Ako se radnjama iz člana 41. stav (1) ovog zakona učini šteta, korisnik lovišta je dužan da nadoknadi štetu vlasniku, odnosno korisniku zemljišta na kome se prostire lovište.

Član 55. (Odgovornost za štetu)

(1) Za štetu koju učini divljač odgovoran je korisnik lovišta.

(2) Za štetu koju prilikom lova divljači učine lovci i njihovi pomoćnici odgovoran je korisnik lovišta, a korisnik ima pravo naknade od lovaca, odnosno njihovih pomoćnika.

(3) Obaveza oštećenog je da sačuva sve tragove koji ukazuju na učinjenu štetu i počinioća.

(4) Pravo na naknadu štete iz stava (1) i (2) ovog člana pripada vlasniku stoke i zemljišta, odnosno korisniku zemljišta, pod uslovom da je preduzeo potrebne mjere za sprečavanje štete od divljači.

Član 56. (Postupak utvrđivanja štete)

(1) Prijava o učinjenoj šteti od divljači podnosi se Odjeljenju odmah, a najkasnije u roku od tri dana od dana kada je šteta nastala.

(2) Gradonačelnik na prijedlog šefa Odjeljenja je dužan odmah, a najkasnije tri dana po prijemu prijave štete, imenovati komisiju za utvrđivanje uzroka štete i procjenu visine štete.

(3) Komisiju sačinjavaju tri člana:

- a) predstavnik Odjeljenja koji je predsjednik komisije;
- b) stručno lice za procjenu visine štete poljoprivredne ili veterinarske struke;
- c) stručno lice za utvrđivanje uzroka štete šumarske, veterinarske, poljoprivredne ili biološke struke sa iskustvom na istim poslovima, koga predloži korisnik lovišta.

(4) Komisija je dužna da odmah izvrši uviđaj na koji se poziva oštećeni i predstavnik korisnika lovišta.

(5) Komisija o svom radu sačinjava zapisnik koji obavezno sadrži:

- a) mjesto i način nastanka štete;
- b) znakove koji upućuju na određenu vrstu divljači;
- c) obim i visinu štete;
- d) preduzete mjere oštećenog prije i poslije učinjene štete;
- e) zaključno mišljenje o ispunjenosti uslova za naknadu štete.

Član 57. (Postupak naknade štete)

(1) Po prijemu zapisnika iz člana 56. stava (5) ovog zakona, Odjeljenje sporazumno utvrđuje štetu između oštećenog i korisnika lovišta.

(2) Sporazum o naknadi štete sadrži visinu naknade i rok njene isplate i ima snagu izvršnog naslova.

(3) Ukoliko se ne postigne sporazum iz stava (2) ovog člana, oštećeni može podnijeti tužbu Osnovnom sudu radi utvrđivanja štete i njene visine.

Član 58. (Odšteteni cjenovnik)

(1) Fizička i pravna lica koja odstrijele ili učine štetu divljači bespravnim lovom ili na drugi nezakoniti način, dužni su korisniku lovišta nadoknaditi štetu prema odštetnom cjenovniku.

(2) Odštetni cjenovnik iz stava (1) ovog člana donosi Vlada, na prijedlog korisnika lovišta i mišljenja Odjeljenja.

(3) Sporove o naknadi štete iz stava (1) ovog člana rješava Osnovni sud.

GLAVA VII - SREDSTVA ZA ZAŠTITU, UZGOJ DIVLJAČI I UNAPREĐENJE LOVSTVA

Član 59. (Unapređenje lovstva)

- (1) Sredstva za zaštitu, uzgoj divljači i unapređenje lovstva obezbjeđuju se iz:
- a) prihoda korisnika lovišta ostvarenog gazdovanjem lovištem;
 - b) sredstava koja korisnik lovišta ostvari po osnovu naknade za štete;
 - c) ostalih izvora.
- (2) Prihod koji ostvari korisnik lovišta koristi se za očuvanje i poboljšanje kvaliteta lovnih resursa, u koje se ubrajaju:
- a) integralna zaštita, održavanje i poboljšanje kvaliteta staništa, životnih uslova i reprodukcije divljači u lovištu;
 - b) dostizanje i održavanje biološke ravnoteže, polne i starosne strukture osnovnih vrsta divljači u okviru utvrđenog kapaciteta lovišta;
 - c) obnova autohtonih i unošenje novih vrsta divljači u lovište;
 - d) čuvanje i zaštita divljači i lovišta;
 - e) izgradnja lovno-uzgojnih i lovno-tehničkih objekata, te druge infrastrukture u lovištu;
 - f) preduzimanje mjera za smanjenje šteta koje počinu divljač;
 - g) stručno obrazovanje i usavršavanje kadrova;
 - h) izrada planskih dokumenata, programa i studija razvoja lovstva;
 - i) naučno-istraživački rad u lovstvu;
 - j) nabavka rasnih lovačkih pasa;
 - k) izdavačka djelatnost iz oblasti lovstva;
 - l) plaćanje naknade za korištenje lovnog fonda.
- (3) Korisnik lovišta dužan je voditi evidenciju o prikupljanju i utrošku sredstava iz stava (1) ovog člana i podnositi godišnji izvještaj Odjeljenju.

Član 60. (Korištenje sredstava od naknade za korištenje lovnog fonda)

- (1) Sredstva od naknade za korištenje lovnog fonda iz člana 29. ovog zakona koriste se isključivo kao namjenska sredstva za unapređivanje lovstva.
- (2) Pravo korištenja sredstava iz stava (1) ovog člana ima korisnik lovišta.
- (3) Sredstva iz stava (1) ovog člana dodjeljuju se na osnovu kriterija utvrđenih pravilikom koji donosi Vlada na prijedlog šefa Odjeljena.
- (4) Zahtjev za dodjelu sredstava iz stava (1) ovog člana, zajedno sa projektom za unapređivanje lovstva, podnosi se Odjeljenju.

(5) Gradonačelnik zaključuje ugovor sa korisnikom lovišta kome su odobrena sredstva iz stava (1) ovog člana.

(6) O izvršenim obavezama po osnovu ugovora iz stava (5) ovog člana korisnik lovišta podnosi Odjeljenju izvještaj o opravdanosti utroška sredstava do 31. decembra tekuće godine.

(7) Kontrolu namjenskog utroška sredstava iz stava (1) ovog člana vrši Odjeljenje i nadležni inspektor.

Član 61. (Podsticanje razvoja lovstva)

(1) Za podsticanje razvoja lovstva, a posebno radi zaštite i uzgoja vrijednih, rijetkih i proređenih vrsta divljači, za potrebe naučno-istraživačkog rada, propagande, informativne i izdavačke djelatnosti Odjeljenje može planirati sredstva u Budžetu Brčko distrikta BiH.

(2) Izdvajanje sredstava iz stava (1) ovog člana vrši se u skladu sa Zakonom o budžetu Brčko distrikta BiH.

GLAVA VIII – KADROVI U LOVSTVU

Član 62. (Obezbjeđenje stručnih poslova)

Korisnik lovišta mora obezbijediti da planiranje i realizaciju stručnih poslova lovstva obavlja lice sa najmanje VII stepenom stručne spreme šumarske, biološke, poljoprivredne ili veterinarske struke, kao odgovorno lice za te poslove.

Član 63. (Lovočuvarska služba)

(1) Korisnik lovišta dužan je da organizuje lovočuvarsku službu.

(2) Lovočuvarsku službu vrše lovočuvari, kao ovlaštena službena lica, koja su u radnom odnosu kod korisnika lovišta.

(3) Lovočuvari vrše dužnost naoružani lovačkim oružjem, u uniformi sa službenom oznakom lovočuvara.

(4) Lovočuvar može biti lice koje:

a) ima najmanje IV stepen stručne spreme šumarske, biološke, poljoprivredne ili

- veterinarske struke;
- b) ima položen lovački ispit;
- c) ispunjava uslove za nošenje oružja;
- d) ispunjava druge uslove utvrđene zakonom i aktima korisnika lovišta.

(5) Šef Odjeljenja donosi podzakonski akt kojim utvrđuje vrstu uniforme, oznake lovočuvara, vrstu, uslove za nošenje i način upotrebe oružja.

Član 64. **(Legitimacija i službena knjiga lovočuvara)**

- (1) Lovočuvar posjeduje legitimaciju lovočuvara i službenu knjigu.
- (2) Legitimaciju i službenu knjigu izdaje korisnik lovišta.
- (3) Šef Odjeljenja donosi podzakonski akt kojim utvrđuje:
 - a) oblik i sadržaj obrasca legitimacije lovočuvara i službene knjige;
 - b) vođenje evidencije o izdatim legitimacijama i službenim knjigama.

Član 65. **(Ovlaštenja lovočuvara)**

- (1) Lovočuvar je ovlašten i dužan da:
 - a) od lica zatečenog sa sredstvima za lov ili lovačkim psima u lovištu zahtijeva da pokaže lične isprave kojima se utvrđuje njegov identitet, dozvolu za lov, oružani list, kao i dokumenta koja potvrđuju rasnost i identitet pasa;
 - b) zahtijeva lične isprave od lica zatečenog u vršenju prekršaja ili krivičnog djela koji se odnose na lov i od lica za koje postoji osnovana sumnja da je izvršilo takvo djelo ili prekršaj, ako ne može na drugi način da utvrdi identitet tog lica;
 - c) radi pronalaženja predmeta kojima je izvršen prekršaj ili krivično djelo koji se odnose na lov, vrši pregled vozila i drugih sredstava za prevoz i prenošenje stvari, za koja postoji osnovana sumnja da prevoze, odnosno prenose ulovljenu divljač, dijelove ulovljene divljači ili trofeje od divljači;
 - d) pregleda ulov i sredstva za lov, kao i da utvrdi da li je lov obavljen u skladu sa propisima;
 - e) privremeno oduzme ulov, sredstva za lov, kao i druge predmete pronađene u lovištu, ako postoji osnovana sumnja da su upotrebljeni ili namijenjeni za izvršenje krivičnog djela ili prekršaj koji se odnose na lov ili su nastali i pribavljeni izvršenjem krivičnog djela ili prekršaja;
 - f) o utvrđenim nepravilnostima odmah obavijesti šumarskog inspektora, Policiju i korisnika lovišta;
 - g) preduzima druge mjere i radnje za koje je zakonom i drugim propisima ovlašten.

(2) Licu od koga su oduzeti ulov, psi, sredstva i drugi predmeti za lov, lovočuvar izdaje potvrdu o oduzimanju navedenih sredstava.

(3) Lice koje je zatečeno sa sredstvima za lov u lovištu, dužno je da na zahtjev lovočuvara pokaže dozvolu za lov, oružani list i ispravu kojom se utvrđuje njegov identitet, da omogući pregled ulova, sredstva za lov, vozila i drugih sredstava za prevoz i prenošenje stvari.

Član 66. (Pokretanje postupka)

Zahtjev za pokretanje prekršajnog ili krivičnog postupka za bespravan lov, učinjenu štetu na divljači i lovištu, podnosi korisnik lovišta na osnovu zabilješke u službenoj knjizi, izveštaja, odnosno prijave lovočuvara.

GLAVA IX - NADZOR NAD SPROVOĐENJEM ZAKONA

Član 67. (Nadležnosti Odjeljenja)

(1) Nadzor nad sprovođenjem ovog zakona i propisa donesenih na osnovu njega vrši Odjeljenje.

(2) Odjeljenje obavlja sljedeće poslove:

- a) priprema stručne osnove za ustanovljavanje i dodjelu lovišta na gazdovanje;
- b) daje saglasnost na lovnu osnovu i godišnje planove gazdovanja;
- c) sakuplja, obrađuje i analizira podatke i priprema informacije o stanju i razvoju populacije divljači;
- d) vrši druge poslove u upravljanju, zaštiti, korištenju i unapređivanju divljači, lovstva i korištenja lovištima, u skladu sa zakonom.

(3) Odjeljenje može da:

- a) zahtjeva od korisnika lovišta podnošenje izvještaja o vršenju povjerenih poslova;
- b) daje uputstva i upozorava korisnika o neizvršavanju povjerenih poslova.

Član 68. (Inspeksijski nadzor)

Inspeksijski nadzor nad sprovođenjem ovog zakona vrši šumarski inspektor.

Član 69.
(Ovlaštenja i dužnosti inspektora)

(1) U vršenju poslova inspekcijskog nadzora, pored ovlaštenja propisanih Zakonom o inspekcijama Brčko distrikta Bosne i Hercegovine (u daljem tekstu: Zakon o inspekcijama), šumarski inspektor je ovlašten da vrši kontrolu:

- a) propisanih uslova koje korisnik lovišta mora da ispunjava za gazdovanje lovištem;
- b) primjene lovne osnove, godišnjeg plana gazdovanja ili privremenog godišnjeg plana gazdovanja;
- c) izvršenja ugovora o gazdovanju lovištem;
- d) poslovnih knjiga, pravilnika, evidencija i ostale dokumentacije kada je to potrebno radi uvida u korištenje sredstava, primjenu propisa i mjera koje se odnose na divljač i lovište;
- e) organizovanja lova, lov divljači i promet ulovljene divljači i njenih dijelova;
- f) dozvola za lov, propratnica i trofejnih listova za ulovljenju divljač;
- g) vođenja katastra, objekata u lovištu i radova koji se izvode u lovištu;
- h) uplate naknade iz člana 44. ovog zakona;
- i) mjera iz člana 51. i 52. ovog zakona;
- j) izdvajanja, obračuna, evidentiranja i korištenja sredstava iz člana 59., 60. i 61. ovog zakona;
- k) izvršenja obaveza uzgoja divljači i unapređenja lovstva;
- l) poštovanja zabrana predviđenih ovim zakonom;
- m) rada lovočuvarske službe.

(2) U vršenju poslova iz stava (1) ovog člana šumarski inspektor je dužan da:

- a) privremeno zabrani lov i druge radnje koje su protivne odredbama ovog zakona i propisa donijetih na osnovu njega;
- b) privremeno, do konačne odluke nadležnog organa, oduzme protivzakonito ulovljenu divljač i njene dijelove, protivzakonito stavljenju u promet ili protivzakonito prisvojenu uginulu divljač i njene dijelove, kao i sredstva i predmete kojima su izvršene ove radnje;
- c) naredi privremene mjere za sprečavanje šteta u hitnim slučajevima u kojima bi nastupila šteta po opšti interes;
- d) predloži mjeru oduzimanja lovišta, ako korisnik lovišta ne postupi po rješenju;
- e) preduzima druge mjere i radnje za koje je ovlašten posebnim propisima.

(3) U slučajevima iz tačke a), b) i c) stava (2) ovog člana, žalba upućena Apelacionoj komisiji na rješenje šumarskog inspektora ne odlaže izvršenje rješenja.

Član 70.
(Postupanje inspektora)

Ako šumarski inspektor utvrdi da je učinjen prekršaj ili krivično djelo, dužan je postupiti u skladu sa Zakonom o inspekcijama i Zakonom o prekršajima Brčko distrikta Bosne i Hercegovine.

GLAVA X - KAZNENE ODREDBE

Član 71. (Kazne od 3.000 KM do 15.000 KM)

(1) Novčanom kaznom u iznosu od 3.000 KM do 15.000 KM kazniće se za prekršaj pravno lice, odnosno korisnik lovišta ako:

- a) dozvoli da se za vrijeme stalne i privremene zabrane lova zaštićena divljač lovi, proganja ili namjerno uznemirava (član 9. stav (5) ovog zakona);
- b) dozvoli lov vrsta za koje je propisana zabrana lova (član 10. ovog zakona), lovostajem zaštićenih vrsta za vrijeme trajanja lovostaja (član 11. ovog zakona) ili privremena zabrana lova (član 12. ovog zakona);
- c) postupi suprotno odredbama člana 17. ovog zakona;
- d) postupi suprotno odredbama člana 19. ovog zakona;
- e) dozvoli lov divljači na nelovnim površinama (član 20. stav (5) ovog zakona);
- f) postupi suprotno odredbama člana 26. stav (4) ovog zakona;
- g) gazduje lovištem suprotno odredbama lovne osnove i godišnjeg plana gazdovanja lovištem ili dozvoli lov bez lovne osnove i godišnjeg plana gazdovanja lovištem (član 33. stav (2) ovog zakona);
- h) na vrijeme ne donese i ne predloži lovnu osnovu (član 34. stav (2) i član 35. stav (2) ovog zakona);
- i) ne izvrši reviziju lovne osnove (član 35. stav (5) ovog zakona);
- j) ne donese i ne dostavi na odobrenje u propisanom roku privremeni plan gazdovanja lovištem i godišnji plan gazdovanja lovištem (član 37. stav (4) ovog zakona);
- k) prije izrade privremenog plana gazdovanja lovištem i godišnjeg plana gazdovanja lovištem ne utvrdi brojno stanje divljači u lovištu (član 37. stav (5) ovog zakona);
- l) ne donese akt iz člana 42. stav (1) ovog zakona;
- m) postupi suprotno odredbama člana 50. ovog zakona;
- n) nenamjenski koristi ostvarena sredstva ili ne vodi evidenciju o prikupljanju i utrošku sredstva za unapređenje lovstva (član 59. stav (2) i (3) ovog zakona);
- o) nenamjenski koristi sredstva iz člana 59. stav (1) ovog zakona ili ne podnese izvještaj o izvršenim obavezama po osnovu ugovora iz člana 60. stav (5) i (6) ovog zakona;
- p) ne postupi po odredbama člana 62. ovog zakona;
- r) ne obezbijedi i ne organizuje lovočuvarsku službu na način kako je propisano članom 63. ovog zakona);
- s) lovnom inspektoru ne omogući pregled po osnovu ovlaštenja iz člana 69. ovog zakona.

(2) Za prekršaj iz stava (1) ovog člana kazniće se novčanom kaznom od 1.000 KM do 3.000 KM i odgovorno licu u pravnom licu.

Član 72.
(Kazne od 1.500 KM do 10.000 KM)

(1) Novčanom kaznom u iznosu od 1.500 KM do 10.000 KM kazniće se za prekršaj pravno lice, odnosno korisnik lovišta ako:

- a) vrši naseljavanje novih vrsta divljači suprotno odredbama člana 14. ovog zakona;
- b) bez saglasnosti šefa Odjeljenja hvata i drži divljač u ograđenom prostoru (član 18. stav (2) ovog zakona);
- c) ne postupi po odredbama člana 31. ovog zakona;
- d) ne postupi po odredbama člana 32. ovog zakona;
- e) ne postupi po odredbama člana 38. ovog zakona;
- f) ne ustanovi i na vrijeme ne dostavi Odjeljenju katastar lovišta (član 40. stav (1) i (2) ovog zakona);
- g) dozvoli lov licima koja nemaju položen lovački ispit i oružani list (član 41. stav (2) ovog zakona);
- h) ne obezbijedi dozvolu za lov iz člana 41. stav (3) ovog zakona;
- i) dozvoli učešće u lovu bez pratnje lovočuvara ili stručnog pratioca (član 41. stav (4) ovog zakona) ili učešće u lovu bez nadzora lovca mentora (član 41. stav (5) ovog zakona);
- j) ne pridržava se cjenovnika odstrjela, korištenja divljači i usluga u lovištu (član 44. ovog zakona);
- k) postupi suprotno odredbama člana 47. ovog zakona;
- l) dozvoli iznošenje trofeja van Distrikta (član 48. stav (4) ovog zakona);
- m) u lovu ne koristi odgovarajuću vrstu pasa ili koristi lovačke pse bez posjedovanja dokumenata kojim potvrđuju rasnost i identitet psa (član 51. stav (1) i (2) ovog zakona);
- n) ne preduzima potrebne mjere za sprečavanje štete koju divljač može nanijeti ljudima ili njihovoj imovini (član 53. stav (1) ovog zakona);
- o) postupi protivno odredbama člana 58. stav (1) ovog zakona;
- p) ne izda legitimaciju lovočuvara i službenu knjigu (član 64. stav (2) ovog zakona).

(2) Za prekršaj iz stava (1) ovog člana kazniće se novčanom kaznom od 500 KM do 1.500 KM i odgovorno lice u pravnom licu.

Član 73.
(Kazne od 300 KM do 1.500 KM)

Novčanom kaznom od 300 KM do 1.500 KM kazniće se za prekršaj fizičko lice ako:

- a) lovi, proganja ili najmerno uznemirava stalno zaštićenu divljač i privremeno zaštićenu divljač (član 9. stav (5) ovog zakona);
- b) postupi suprotno odredbama člana 17. ovog zakona;
- c) bez saglasnosti šefa Odjeljenja hvata i drži divljač u ograđenom prostoru (član 18. stav (2) ovog zakona);

- d) postupi suprotno odredbama člana 19. ovog zakona;
- e) vrši lov bez odobrenja za lov (člana 41. stav (2) i (3) ovog zakona);
- f) vrši lov bez pratnje lovočuvara ili stručnog pratioca (član 41. stav (4) ovog zakona) ili učestvuje u lovu bez nadzora lovca mentora (član 41. stav (5) ovog zakona);
- g) vrši promet divljači i njenih dijelova suprotno odredbama člana 42. stav (4) ovog zakona;
- h) iznosi sa područja lovišta ulovljenu divljač i njene dijelove bez propratnice, odnosno trofejnog lista (član 45. i 46. ovog zakona);
- i) na zahtjev lovočuvara ne pokaže lovačke i druge isprave ili ne dozvoli pregled ulova, sredstva za lov ili sredstva za prevoz, odnosno prenos stvari (član 65. stav (3) ovog zakona).

Član 74.
(Kazne od 100 KM do 1.000 KM)

Novčanom kaznom od 100 KM do 1.000 KM kazniće se za prekršaj fizičko lice ako:

- a) lovi divljač na nelovnim površinama (član 20. stav (5) ovog zakona);
- b) postupi suprotno odredbama člana 49. ovog zakona;
- c) pušta pse da se bez kontrole kreću po lovištu (član 51. stav (3) ovog zakona);
- d) pušta bez stada ovčarske pse po lovištu (član 51. stav (4) ovog zakona);
- e) postupi suprotno odredbama člana 52. stav (2) i (3) ovog zakona;
- f) ne vrši službu lovočuvara u uniformi, naoružan i sa oznakama lovočuvara (član 63. stav (3) ovog zakona);
- g) ne vrši službu lovočuvara sa službenom legitimacijom i službenom knjigom (član 64. stav (1) ovog zakona);
- h) ne izda potvrdu licu od koga je oduzeo ulov i sredstva i druge predmete za lov (član 65. stav (2) ovog člana).

GLAVA XI - PRELAZNE I ZAVRŠNE ODREDBE

Član 75.
(Prestanak primjene propisa)

Danom stupanja na snagu ovog zakona na teritoriji Distrikta prestaje se primjenjivati Zakon o lovstvu („Službeni glasnik Republike Srpske“, broj: 13/94).

Član 76.
(Rok za donošenje podzakonskih akata)

Podzakonski akti koji se donose na osnovu ovog zakona donose se u roku od 12 mjeseci od dana stupanja na snagu ovog zakona, ukoliko ovim zakonom nije drugačije propisano.

Član 77.
(Primjena propisa u prelaznom periodu)

Do donošenja podzakonskih akata iz člana 76. ovog zakona primjenjuju se podzakonski akti koji su važili u vrijeme stupanja na snagu ovog zakona, ukoliko nisu u suprotnosti sa ovim zakonom.

Član 78.
(Stupanje zakona na snagu)

Ovaj zakon stupa na snagu osmog dana od dana objavljivanja u "Službenom glasniku Brčko distrikta BiH".

Broj:

PREDSJEDNIK SKUPŠTINE

Brčko,